


集異門足論

才十七

三百六  
氣七

50308



阿毗達磨集異門足論卷第十七

氣

尊者舍利子說

三藏法師玄奘奉

詔譯

七法品第八之二

七非妙法者云何為七  
一不信二無慚三無愧四懈怠五失念六不定七惡慧云何不  
信  
答諸不信不信性不現前  
信性不隨順不

印可不已忍樂不當忍樂不現忍樂  
心不清淨是名不信云何無慚答諸無慚乃  
至廣說是名無慚云何無愧答諸無愧乃至廣說是  
名無愧云何懈怠答諸下精進性劣精進性  
怯精進性懼精進性廣說乃至心懈怠懈怠  
性心不勇悍不勇悍性是名懈怠云何失念



答諸空念性虛念性失念性心外念性是名  
失念云何不定答心散亂性云何心散亂性  
答諸心散性若心亂性心撻擾性心流蕩性  
不一境性不安住性是名心散亂性云何惡  
慧答於不如理所引簡擇執爲如理所引於  
如理所引簡擇執爲不如理所引是名惡慧  
如是七種名非妙法門何緣是七名非妙法  
答非妙謂非善士此是彼法名非妙法謂此  
諸法非善士邊可獲可得此是彼士所有現  
有故說是七名非妙法  
七妙法者云何爲七答一信二慙三愧四精  
進五念六定七慧云何信答諸信信性現前

信性隨順印可已。忍樂當忍樂現忍樂心清  
淨是名信云何慙。答諸慙慙性乃至廣說是  
名慙云何愧。答諸愧愧性乃至廣說是名愧  
云何精進。答諸非下精進性乃至廣說是名  
精進云何念。答諸念隨念廣說乃至心明記  
性是名念云何定。答諸心任廣說乃至心一  
境性是名定云何慧。答於如理所引簡擇覺  
為如理所引於不如理所引簡擇覺為不如  
理所引是名慧如是七種名為妙法問何緣  
是七名為妙法。答妙謂善士此是彼法故名  
妙法謂此諸法惟善士邊可獲可得此是彼  
士所有現有故說是士名為妙法。

復有七非妙法者云何爲七答一不知法二  
不知義三不知時四不知量五不自知六不  
知衆七不知補特伽羅有勝有劣不知法者  
謂不了知如來教法謂契經應誦記說伽他  
自說因緣譬喻本事本生方廣希法論議是  
名不知法不知義者謂不了知彼彼語義謂  
如是如是語有如是如是義是名不知義不  
知時者謂不了知是時非時謂此時應修止  
相此時應修舉相此時應修捨相等是名不  
知時不知量者謂不了知種種分量謂所飲  
所食所嚐所噉若行若住若坐若卧若睡若  
覺若語若默若解勞悶等所有分量是名不

知量不自知者謂不了知自德多少謂自所  
有若信若戒若聞若捨若慧若教若證若念  
若族姓若辯才等是名不自知不知衆者謂  
不了知衆會勝劣謂此是刹帝利衆此是婆  
羅門衆此是長者衆此是居士衆此是沙門  
衆此是外道衆我於此中應如是行應如是  
住應如是坐應如是語應如是默等是名不  
知衆不知補特伽羅有勝有劣者謂不了知  
補特伽羅德行勝劣謂如是如是補特伽羅  
有如是如是德行或勝或劣是名不知補特  
伽羅有勝有劣如是七種名非妙法問何緣  
是七名非妙法答非妙謂非善士此是彼法

名非妙法謂此諸法非善士邊可獲可得出  
是彼士所有現有故說是七名非妙法  
復有七妙法者云何爲七答一知法二知義  
三知時四知量五自知六知衆七知補特伽  
羅有勝有劣知法者謂正了知如來教法謂  
契經應誦記說伽他自說因緣譬喻本事本  
生方廣希法論議是名知法知義者謂正了  
知彼彼語義謂如是如是語有如是如是義  
是名知義知時者謂正了知是時非時謂此  
時應修止相此時應修舉相此時應修捨相  
等是名知時知量者謂正了知種種分量謂  
所飲所食所嗜所噉若行若住若坐若卧若



睡若覺若語若默若解勞悶等所有分量是  
名知量自知者謂正了知自德多少謂自所  
有若信若戒若聞若捨若慧若教若證若念  
若族姓若辯才等是名自知知衆者謂正了  
知衆會勝劣謂此是刹帝利衆此是婆羅門  
衆此是長者衆此是居士衆此是沙門衆此  
是外道衆我於此中應如是行應如是任應  
如是坐應如是語應如是默等是名知衆知  
補特伽羅有勝有劣者謂正了知補特伽羅  
德行勝劣謂如是如是補特伽羅有如是如  
是德行或勝或劣是名知補特伽羅有勝有  
劣如是七種名爲妙法問何緣是七名爲妙

法答妙謂善士此是彼法故名妙法謂此諸  
法惟善士邊可獲可得此是彼士所有現有  
故名妙法

七識住者云何為七答有色有情種種身種  
種想如人及一分天是名第一識住有色有  
情種種身一種想如梵眾天劫初起位是名  
第二識住有色有情一種身種種想如光音  
天是名第三識住有色有情一種身一種想  
如徧淨天是名第四識住無色有情超一切  
色想滅有對想不思惟種種想入無邊空空  
無邊處具足住如空無邊處天是名第五識  
住無色有情超一切空空無邊處入無邊識

無邊處具足任如識無邊處天是名第七識  
任無色有情超一切識無邊處入無所有無  
所有處具足任如無所有處天是名第七識  
任此中有色者謂彼有情有色施設有色身  
有有色處有有色界有色蘊故名有色有情  
者謂諦義勝義雖諸有情不可獲不可得無  
所有非現有而依蘊界處假立有情諸想等  
想施設言說轉謂有情人意生儒童命者生  
者養者士夫補特伽羅故名有情種種身者  
謂彼有情有種種顯色身種種相種種形非  
一顯色非一相非一形故名種種身種種想  
者謂彼有情有樂想苦想不苦不樂想故名

種種想如人及一分天者謂揔顯示人及欲  
界天故名如人及一分天是名第一者漸次  
順次相續次第數為第一識住者云何識住  
答即此所繫所有色受想行識蘊揔名識住  
有色者謂彼有情有色施設有色身有色  
處有有色界有色蘊故名有色有情者謂諦  
義勝義雖諸有情不可獲不可得無所有非  
現有而依蘊界處假立有情諸想等想施設  
言說轉謂有情人意生儒童命者生者養者  
士夫補特伽羅故名有情種種身者謂彼有  
情有種種顯色身種種相種種形非一顯色  
非一相非一形故名種種身一種想者謂諸

有情在時有分於此世界劫將壞時多往生  
上光音等天衆同分中於彼具足意成色身  
根無缺減支分圓滿形顯清淨喜爲所取喜  
爲所食長壽久住有時有分於此世界劫初  
成時於下空中有空宮殿欬然而起有一有  
情由壽盡故業盡故福盡故先從光音等天  
衆同分沒生下梵世空宮殿中獨一無二無  
諸侍者長壽久住時彼有情長時住已欬然  
生愛及生不樂作如是念云何當令諸餘有  
情生我同分爲我伴侶當彼有情起此心願  
有餘有情亦壽盡故業盡故福盡故復從光  
音等天衆同分沒生下梵宮與前有情共爲

伴侶時前生者便作是念我先於此獨一無  
二長壽久住長時住已歎然生愛及生不樂  
作如是念云何當令諸餘有情生我同分為  
我伴侶我起如是心願之時是諸有情便生  
此處滿我意願為我伴侶是故當知此有情  
類是我所化我於此類及餘世間是自在者  
作者化者生者起者是真父祖時諸有情亦  
作是念我等曾見如是有情獨一無二長壽  
久住時彼有情長時住已歎然生愛及生不  
樂作如是念云何當令諸餘有情生我同分  
為我伴侶於彼正起此心願時我等便生彼  
同分內為彼伴侶由斯我等是被所化彼於

有情及世間物是自在者作者化者生者起者是真父祖故名一想如梵衆天者謂此義中揔顯生在梵衆等天有種種身惟有一想劫初起住者謂劫初生時是名第二者漸次順次相續次第數爲第二識住者云何識住答即此所繫所有色受想行識蘊揔名識住

有色者謂彼有情有色施設有色身有色處有有色界有色蘊故名有色有情者謂諦義勝義雖諸有情不可獲不可得無所有非現有而依蘊界處假立有情諸想等想施設言說轉謂有情人意生儒童命者生者養者士夫補特伽羅故名有情一種身者謂彼有

情有一顯色身一種相一種形無種種顯色  
無種種相無種種形故名一種身種種想者  
謂彼有情有樂想不苦不樂想故名種種想  
如光音天者謂揔顯示光音等天是名第三  
者漸次順次相續次第數為第三識住者云  
何識住答即此所繫所有色受想行識蘊揔  
名識住有色者謂彼有情有色施設有色身  
有有色處有有色界有色蘊故名有色有情  
者謂諦義勝義雖諸有情不可獲不可得無  
所有非現有而依蘊界處假立有情諸想等  
想施設言說轉謂有情人意生儒童命者生  
者養者士夫補特伽羅故名有情一種身者



謂彼有情有一顯色身一種相一種形無種  
種顯色無種種相無種種形故名一種身一  
種想者謂彼有情唯有樂想故名一種想如  
徧淨天者謂揔顯示徧淨等天是名第四者  
漸次順次相續次第數為第四識住者云何  
識住答即此所繫所有色受想行識蘊揔名  
識住無色者謂彼有情無色施設無色身無  
有色處無有色界無色蘊故名無色有情者  
謂諦義勝義雖諸有情不可獲不可得無所  
有非現有而依蘊界處假立有情諸想等想  
施設言說轉謂有情人意生儒童命者生者  
養者士夫補特伽羅故名有情超一切色想

者謂超一切眼識身相應想滅有對想者謂  
滅四識身相應想不思惟種種想者謂無五  
身識所引意識相應緣色等種種障礙定想  
入無邊空空無邊處具足住如空無邊處天  
者謂揔顯示空無邊天是名第五者漸次順  
次相續次第數爲第五識住者云何識住答  
卽此所繫所有受想行識蘊揔名識住無色  
者謂彼有情無色施設無色身無有色處無  
有色界無色蘊故名無色有情者謂諦義勝  
義雖諸有情不可獲不可得無所有非現有  
而依蘊界處假立有情諸想等想施設言說  
轉謂有情人意生儒童命者生者養者士

補特伽羅故名有情超一切空無邊處入無  
邊識識無邊處具足任如識無邊處天者謂  
揔顯示識無邊處天是名第六者漸次順次  
相續次第數爲第六識任者去何識任答即  
此所繫所有受想行識蘊揔名識任無色者  
謂彼有情無色施設無色身無有色處無有  
色界無色蘊故名無色有情者謂諸義勝義  
雖諸有情不可獲不可得無所有非現有而  
依蘊界處假立有情諸想等想施設言說轉  
謂有情人意生儒童命者生者養者士夫補  
特伽羅故名有情超一切識無邊處入無所  
有無所有處具足任如無所有處天者謂揔

顯示無所有處。天是名第七者。漸次順次相續次第數爲第七識住者云。何識住。答。即此所繫所有受想行識蘊。揔名識住。

七隨眠者云。何爲七。答。一欲貪隨眠。二瞋隨眠。三有貪隨眠。四慢隨眠。五無明隨眠。六見隨眠。七疑隨眠。云。何欲貪隨眠。答。若於諸欲。

諸貪等貪。乃至廣說。是名欲貪隨眠。云。何瞋隨眠。答。若於有情欲爲損害。乃至廣說。是名瞋隨眠。云。何有貪隨眠。答。於色無色諸貪等貪。乃至廣說。是名有貪隨眠。云。何慢隨眠。答。諸慢恃執。乃至廣說。是名慢隨眠。云。何無明隨眠。答。三界無智。是名無明隨眠。云。何見隨眠。

眠答五見是名見隨眠謂有身見邊執見邪見見取戒禁取如是五見名見隨眠云何疑隨眠答於諦猶豫是名疑隨眠

七無過失事者云何為七具壽當知有聖弟子於如來所修植淨信根生安住不為沙門或婆羅門或天魔梵或餘世間如法引奪是

名第一無過失事復次具壽有聖弟子安住淨戒精勤守護別解脫律儀軌則所行無不具足於微小罪見大怖畏受學學處常無毀犯是名第二無過失事復次具壽有聖弟子親近善友善為伴侶與善交通是名第三無過失事復次具壽有聖弟子樂居閑寂具

遠離謂身遠離及心遠離是名第四無過失  
事復次具壽有聖弟子勤精進住有勢有勤  
有勇堅猛於諸善法常不捨輒是名第五無  
過失事復次具壽有聖弟子具念安住成就  
最勝常委念支久作久說皆能憶念是名第  
六無過失事復次具壽有聖弟子具慧安住  
成就世間有出沒慧聖慧出慧善通達慧彼  
所作慧正盡苦慧是名第七無過失事於如  
來所修植淨信者云何如來答應正等覺說  
名如來云何淨信答若依出離遠離所生義  
法諸信信性廣說乃至心清淨性故名淨信  
即此淨信於如來所已修植當修植現修植

是故說爲於如來所修植淨信根生等言。如前廣說是名第一者。漸次順次相續次第數。爲第一無過失事者。謂能顯示清淨永斷安住淨戒者。云何淨戒。答諸所作業。謂身律儀。語律儀。命清淨。是名淨戒。安住者。謂成就淨戒。修行勝行。進趣契會。故名安住。精勤守護。別解脫律儀者。云何別解脫。答謂諸如來。正等覺廣說。乃至佛薄伽梵。自知自見。爲諸苾芻。半月半月常所宣說。別解脫契經。是名別解脫。問何緣說此名別解脫。答最勝善法。由此爲門。此爲上首。此爲初緣。別行別由。斯故立別解脫名。精勤守護。此律儀者。謂於

如是別解脫法恒隨作恒隨轉由斯故說精  
勤守護別解脫律儀軌則所行無不具足者  
謂諸苾芻衆有五非軌則及五非所行云何  
名爲五非軌則答一他勝罪二衆餘罪三墮  
煮罪四別首罪五惡作罪云何名爲五非所  
行云答一國王家二執惡家三姪女家

家五酤酒家諸聖弟子於此所說五非  
五非所行常樂遠離止息棄捨於正軌則及  
正所行具足成就由斯故說軌則所行無不  
具足於微小罪見大怖畏者謂於小罪起極  
怖想由斯故說於微小罪見大怖畏受學學  
處常無毀犯者謂聖弟子不作是念我於如



是如是學處應勤修學我於如是如是學處  
不勤修學諸聖弟子常作是念一切如來應  
正等覺廣說乃至佛簿伽梵自知自見凡所  
制立一切學處我皆受學常無毀犯由斯故  
說受學學處常無毀犯是名第二者漸次順  
次相續次第數為第二無過失事者

示清淨永斷親近善友者云何善友者  
如來應正等覺及佛弟子皆名善友復次若  
有補特伽羅具戒具德乃至廣說故名善友  
於斯善友親近等親近極親近隨順承奉供  
養恭敬是故說為親近善友云何名為善友  
伴侶答於斷生命若不與取若欲邪行若虛

誑語若飲諸酒皆能遠離止息棄捨猒患  
斷說名爲善與此善者爲伴爲侶隨順趣向  
身心無二是故說爲善爲伴侶云何名爲與  
善交通答若於具信具戒多聞具捨具慧隨  
轉隨屬隨順不逆是故說爲與善交通復次  
若於具足出離遠離善法隨轉隨屬隨順不  
逆是故說爲與善交通復次若於具足出離  
遠離善法一樂一欲一喜一愛同樂同欲同  
喜同愛是故說爲與善交通是名第三者漸  
次順次相續次第數爲第三無過失事者謂  
能顯示清淨永斷樂居閑寂者云何名爲樂  
居閑寂答諸空迥舍皆名閑寂若任此中

喜愛樂不生愁思心無厭怖是故說為樂  
閑寂具二遠離謂身遠離及心遠離者謂任  
此中能勤修學內心寂止不離靜慮成就妙  
觀長空迥舍勤修自義能勤修學內心寂止  
者謂任此中能勤精進修學世間四種靜慮  
不離靜慮者謂於世間四種靜慮常勤思慕  
不下不劣無怯無斷是故說為不離靜慮成  
就妙觀者謂於世間四種靜慮相應妙慧具  
足成就是故說為成就妙觀長空迥舍者謂  
任閑寂空迥舍中由簡擇力歡喜愛樂不生  
愁思心無厭怖增長身心及諸善法是故說  
為長空迥舍勤修自義者謂諸受遠離滅

槃名最上義亦名自義於如是義精勤修學  
求疾證得是故說爲勤修自義是名第四者  
漸次順次相續次第數爲第四無過失事者  
謂能顯示清淨增語勤精進住者云何精進  
答若於出離遠離所生善法精勤勇猛勢用  
策勵不可制伏策心相續是名精進由彼成  
就如是精進於所修習能行勝行進趣證會  
是故說爲勤精進住有勢者謂彼上品精進  
圓滿故名有勢有勤者謂即顯示精進堅固  
故名有勤有勇堅猛者謂由成就精進力故  
勇決而取堅住而取猛利而取諸有所取是  
善非惡隨所取相守護不捨如獲他國善能

守護是故說爲有勇堅猛於諸善法常不捨  
輒者謂於善法不捨勤勇熾然精進無間無  
斷是故說爲於諸善法常不捨輒是名第五  
者漸次隨次相續次第數爲第五無過失事  
者謂能顯示清淨增語具念安任者云何爲  
念若依出離遠離所生善法諸念隨念乃  
至廣說是名爲念成就最勝常委念支者謂  
八支聖道說名常委此念是彼一支所攝謂  
正念支是故說爲成就最勝常委念支久作  
久說皆能憶念者謂由此念於曾更事不忘  
不失令心明記是故既爲久作久說皆能憶  
念是名第六者漸次順次相續次第數爲第

六無過失事者謂能顯示清淨增語具慧安  
任者云何名慧答若依出離遠離所生善法  
於諸法相能簡擇極簡擇廣說乃至毗鉢舍  
那是名爲慧言安任者謂由成就如是慧故  
於諸法相能行勝行進趣證會由斯故說具  
慧安任成就世間有出沒慧者世間謂五取  
蘊云何爲五謂色取蘊受想行識取蘊依由  
成就如是慧故能如實知此五取蘊生及變  
壞由斯故說成就世間有出沒慧言聖慧者  
有二種聖一者善故聖二者無漏故聖此慧  
具由二種聖故說名爲聖故名聖慧言出慧  
者謂彼成就如是慧故能出離欲界及能出

離色無色界故名。出慧善通達。慧者謂彼成就。就如  
是慧故。於苦集滅道諦。由苦集滅道相。能通達善通達。各別通達。是故名爲善通達。慧彼所作。慧者謂彼所引學無間道。所有勝慧。此中說爲彼所作。慧正盡苦慧者。云何名正。答因故。門故。理趣故。行相故。說名爲正。盡苦慧者。五取蘊名爲苦。此慧能令五取蘊盡。等盡徧盡。證永盡。故名盡苦慧。是名第七者。漸次順次相續次第。數爲第七。無過失事者。謂能顯示清淨增語。此中世尊說伽他曰。具信戒善友。居寂樂精勤。成就念正知。名七無過事。

七止諍法者云何為十者一現前毗柰耶二  
憶念毗柰耶三不癡毗柰耶四求彼自性毗  
柰耶五取多人語毗柰耶六取自言持毗柰  
耶七如草覆地毗柰耶如是名為七止諍法  
問何緣是七名止諍法答諍謂彼此鬪訟違  
諍由斯七法隨一現前令所起諍皆調止息  
由此因緣名止諍法

說一切有部集異門足論卷第十七 氣

怯苦劫勇悍下音汗欵然上許勿反率率軛厄音迥  
玄茗反遠也反





9-6